

ЕРЕВАНСКИЙ
ГОСУДАРСТВЕННЫЙ
УНИВЕРСИТЕТ

ФАКУЛЬТЕТ АРМЯНСКОЙ

ФИЛОЛОГИИ



YEREVAN STATE
UNIVERSITY

FACULTY OF ARMENIAN
PHILOLOGY

ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆ

ՀԱՅ ԲԱՆԱՍԻՐՈՒԹՅԱՆ ՖԱԿՈՒԼՏԵՏ

Երևան, 0025, Արշակունյաց 52^ա Республика Армения, Ереван, 0025, Абовяна 52^а 52^а Abovyan,
0025, Yerevan, Republic of Armenia (+374 10) 54-43-91/94,95,96/1-37,
armphilology@ysu.am, www.ysu.am

ԱՐՁԱՆԱԳՐՈՒԹՅՈՒՆ ԹԻՎ 5

ԵՊՀ ՀԱՅ ԲԱՆԱՍԻՐՈՒԹՅԱՆ ՖԱԿՈՒԼՏԵՏԻ ԳԻՏՈՐՈՂՆԵՐԻ՝ 2025 Թ. ՀՈՒՆԻՍԻ 4-ԻՆ
ԿԱՅԱՑԱԾ ՆԻՍՏԻ

Օրակարգում՝

1. Հայ նորագույն գրականության պատմության և գրաքննադատության ամբիոնի վարիչի ընտրություն:
2. Առկա ուսուցման 2024-25 ուստարվա բակալավրիատի ավարտական աշխատանքների պաշտպանության և ամփոփիչ ատեստավորման հանձնաժողովների նախագահների հաշվետվություն:
3. Առկա ուսուցմամբ ասպիրանտների տարեկան ատեստավորում:
4. Հայ բանասիրության ֆակուլտետի բակալավրիատի և մագիստրատուրայի կրթական ծախսերի ղեկավարների հաշվետվություն:
5. Ընթացիկ հարցեր:

Օրակարգի 1-ի հարցի Ֆակուլտետի ղեկան, դոց. Ա. Գալստյանը նախ ներկայացրեց ամբիոնի վարիչի ընտրության ընթացակարգը, այնուհետև տեղեկացրեց, որ հայ նորագույն գրականության պատմության և գրաքննադատության ամբիոնի վարիչի թափուր պաշտոնի համար դիմել է 1 թեկնածու՝ Բ. Գ. Թ., դոցենտ Սեյրան Զավենի Գրիգորյանը: Ֆակուլտետը ստացել է թեկնածուի գործը, փաստաթղթերը ամբողջական են, նախապես տեղի է ունեցել նաև ամբիոնի նիստ, որտեղ կայացել է քվեարկություն: Ամբիոնի նիստի քվեարկության արդյունքները, ինչպես նաև թեկնածուի գործերը ներկայացնելու համար խոսքը տրվեց ֆակուլտետի մրցութային հանձնաժողովի նախագահ պրոֆ. Ա. Աբաջյանին: Պրոֆ. Ա. Աբաջյանը ընթերցեց մրցութային հանձնաժողովի նիստի արձանագրությունը, որում մասնավորապես նշված էր.

ԼՍԵՑԻՆ - Հայ նորագույն գրականության պատմության և գրաքննադատության ամբիոնի վարիչի թափուր պաշտոնի համար դիմած թեկնածուի հարցը: Նիստը վարում էր հայ

բանասիրության ֆակուլտետի մրցութային հանձնաժողովի նախագահ , բ. գ. դ., պրոֆ. Ա. Աբաջյանը:

Նշվեց, որ ամբիոնի վարիչի թափուր պաշտոնի համար հայտարարված մրցույթին մասնակցելու համար դիմել է բ. գ. թ., դոցենտ Սեյրան Զավենի Գրիգորյանը: Մայիսի 30-ին կայացած նիստում ամբիոնի որոշմամբ տեղի է ունեցել բաց քվեարկություն, որին մասնակցած յոթ ամբիոնակիցներն էլ կողմ են քվեարկել և դոցենտ Ս. Գրիգորյանին երաշխավորել մասնակցելու հայ նորագույն գրականության պատմության և գրաքննադատության ամբիոնի վարիչի թափուր պաշտոնի համար հայտարարված մրցույթին:

Նշվեց, որ Ս. Գրիգորյանը 1987-ից աշխատում է նույն ամբիոնում, 2015-2025թթ. ղեկավարել է այն՝ այդ ընթացքում դրսևորելով գիտամանկավարժական հմտություններ: Զգալի ավանդ ունի գիտական կադրեր պատրաստելու գործում:

Գրիգորյանը ակտիվորեն մասնակցում է ֆակուլտետի գիտական և ուսումնական կյանքին: Վերջին հինգ տարիների ընթացքում նրա նախաձեռնությամբ ամբիոնում կատարվել է կրթական ծրագրերի բարելավում, բակալավրիատում և մագիստրատուրայում ներդրվել են նոր դասընթացներ:

Իր պաշտոնավարման ժամանակահատվածում կազմակերպել է հանրապետական 6 գիտաժողովներ, շարունակել «Զարենցյան ընթերցումներ» և «Մաթևոսյանական ընթերցումներ» հոբելյանական նստաշրջանների ավանդույթը:

Վերջին ութ տարիների ընթացքում Գրիգորյանը հրատարակել է 3 մենագրություն, որոնցից վերջինը տպագրվել է Հայագիտական ուսումնասիրությունները ֆինանսավորող համահայկական հիմնադրամի դրամաշնորհով:

Գրիգորյանը լավագույն գործընկեր է և սիրված դասախոս:

Մայր բուհի 100-ամյակի առթիվ նա պարգևատրվել է ՇՊՀ Ոսկե մեդալով:

ԵԶՐԱԿԱՑՈՒԹՅՈՒՆ - Հիմք ընդունելով վերոգրյալները՝ մրցութային հանձնաժողովը որոշեց դոցենտ Սեյրան Զավենի Գրիգորյանին երաշխավորել մասնակցելու հայ նորագույն գրականության պատմության և գրաքննադատության ամբիոնի վարիչի թափուր պաշտոնի համար հայտարարված մրցույթին:

Այնուհետև ծրագրային ելույթի համար խոսքը տրվեց թեկնածուին:

Բ. գ. թ., դոցենտ Սեյրան Գրիգորյանը իր ելույթում մասնավորապես նշեց.

Առաջիկա հինգ տարիներին նախատեսում ենք շարունակել գիտակրթական գործունեության այն ուղղությունները և սկզբունքները, որոնք արմատավորվել են ամբիոնի հիմնադրման օրից և պահպանվել ու զարգացել վերջին տասը տարիներին:

Բակալավրիատում շարունակելու ենք խորացնել և զարգացնել 1920 թվականից այս կողմ ընկած հայ գրականության գլխավոր պարբերաշրջանների դասավանդումը: Դրանց երեք բաղադրիչներն են հայ նորագույն գրականության երեք թները՝ 1920-40-ական թթ. հայաստանյան գրականությունը, սփյուռքահայ գրականությունը և տասնամյակներ

շարունակ «Արդի հայ գրականության պատմություն» կոչված շրջանը, որը եկող ուսումնական տարում վերջապես կանվանափոխվի և կկոչվի «20-րդ դարի երկրորդ կեսի հայ գրականություն»: Բացի այդ՝ ուսումնական ծրագրերի թարմացման միտումով ամբիոնը մտքել է նոր առարկա՝ «Բանասիրական աշխատանքի հիմունքներ»: Նախատեսվում է բարեփոխել բակալավրիատի 2-րդ կուրսում վարվող այդ դասընթացը՝ շեշտը դնելով գրականագիտական աշխատանքների տեխնիկական ձևավորման և գրքերի խմբագրման ու հրատարակության սկզբունքներին վերաբերող իրողությունների վրա: 2022 թ. վերակազմավորման արդյունքում կատարվեց ամբիոնի անվանափոխություն, և այն կոչվեց հայ նորագույն գրականության պատմության և գրաքննադատության ամբիոն: Դրանով մեզ վերադարձվեցին ի սկզբանե ամբիոնի ուսումնական ծրագրում ընդգրկված այն դասընթացները, որ վերաբերում են հայ քննադատական մտքի պատմությանը և քննադատության տեսությանը: Առաջիկա տարիներին դրանց դասավանդումը նույնպես կշարունակվի և կզարգանա: Վերջին տարիներին ունեցել ենք նաև բակալավրիատի «Գրականագիտություն» խմբում վարվող մասնագիտական նոր դասընթացի ներդրում: Թարմացման նոր առաջարկ ստանալու դեպքում պատրաստ ենք կազմելու նոր դասընթացներ:

Ամբիոնը զգալի աշխատանք է անում ավարտական աշխատանքների թեմաների առաջադրման և որակյալ ղեկավարման առումներով: Ավարտվող ուսումնական տարում մեր ամբիոնում ավարտական աշխատանք գրող ուսանողների կեսից ավելին՝ վեց հոգի, ստացել է 20 գնահատական: Շարունակելու ենք առաջադրել թարմ, արդիական թեմաներ խորհրդային շրջանի, սփյուռքահայ և ժամանակակից հեղինակների ստեղծագործությունների մասին և հետամուտ լինել դրանց գիտական մշակմանը:

Շարունակելու ենք աշխատանքը մագիստրոսական ծրագրի խորացման և արդյունավետ գործադրման ուղղությամբ: Անցյալ տարի դիմորդների թվի շարունակվող նվազման պայմաններում անցանք մեկուկես տարի տևողությամբ «Հայ գրականություն» մագիստրոսական նոր ծրագրին, որի առաջին շրջանավարտները այս տարվա հունվարին բարեհաջող պաշտպանեցին մագիստրոսական թեզերը: Առաջիկայում շարունակելու ենք երկրորդ կուրս փոխադրված ուսանողների դասավանդման և թեզերի պատրաստման աշխատանքները: Նոր ծրագրի կատարելագործման նպատակով քայլեր ենք կատարելու ինչպես պահպանված դասընթացների ներքին բարելավման, այնպես էլ միավորման արդյունքում դուրս մնացած հին դասընթացները վերականգնելու, հնարավորության դեպքում՝ նաև նոր դասընթացներ մշակելու ուղիով:

Ամբիոնում առավել բարդ է ասպիրանտուրայի վիճակը: Վերջին տասը տարիներին ունեցել ենք մի շարք ասպիրանտներ և հայցորդներ, որոնցից թեկնածուական ատենախոսություն է պաշտպանել միայն մեկը: Ամբիոնի կադրային թարմացմանը սերտորեն առնչվող այս խնդիրը կարգավորելու նպատակով կատարում ենք գիտական և գործնական քայլեր, որոնք

կփորձենք շարունակել ավելի արդյունավետ: Առաջիկա ամիսներին թեկնածուական ատենախոսությունը կպաշտպանի ամբիոնի ևս մեկ հայցորդ:

Բավական արդյունավետ է հայ նորագույն գրականության պատմության և գրաքննադատության ամբիոնի գիտական գործունեությունը: Գիտական հոդվածներից բացի՝ ամբիոնի աշխատակիցները աչքի են ընկնում հատկապես մենագրության ժանրում: 2021 և 2023 հրատարակված իմ երկու մենագրություններից հետո ամբիոնի երկու պրոֆեսորներ ավարտեցին իրենց մենագրությունները: Ժենյա Քալանթարյանի գիրքը արդեն հրատարակվել է, շուտով լույս կտեսնի նաև Արծրուն Ավագյանի գիրքը: Առաջիկա տարիներին նոր մենագրություններով հանդես կգան դոցենտներ Ս. Գրիգորյանը, Ա. Արզումանյանը, Լ. Մեյրանյանը, ասիստենտ Մ. Ղազարյանը:

Ամբիոնի շարունակական լավ ավանդույթներից է մասնակցությունը հանրապետատան և միջազգային գիտաժողովներին: Վերջին տասը տարիներին մեր ամբիոնի նախաձեռնությամբ կազմակերպվել է վեց գիտական նստաշրջան՝ երկու չարենցյան, երեք մաթևոսյանական և մեկ սևակյան: Աշնանը լույս կտեսնի «Մաթևոսյանական ընթերցումներ» գիտական ժողովածուի 5-րդ հատորը: Բարենպաստ հանգամանքների պարագայում կշարունակենք անցկացնել մեր ամբիոնի գիտական դիմագիծը բնութագրող չարենցյան և մաթևոսյանական ընթերցումները, ինչպես նաև մեկանգամյա գիտաժողովներ: Հոկտեմբեր-նոյեմբերին կմասնակցենք Ռազմիկ Դավոյանի 85-ամյակին նվիրված գիտաժողովին, որ կազմակերպում է Համազգային հայ կրթական և մշակութային միությունը, ինչպես նաև արդեն մեր նախաձեռնությամբ կանցկացնենք բանաստեղծ Հովհաննես Գրիգորյանի 80-ամյակին նվիրված գիտական նստաշրջան:

Այնուհետև, ըստ ընթացակարգի, սկսվեցին ելույթները:

Բ. գ. դ., պրոֆեսոր Ա. Մակարյանը իր խոսքում նշեց, որ դոցենտ Գրիգորյանը ունի գիտական, մանկավարժական, մարդկային օրինակելի հատկանիշներ, որոնց շնորհիվ վայելում է գործընկերների և ուսանողների համակրանքը:

Բ. գ. դ., պրոֆեսոր Ա. Աբաջյանը ևս նշեց, որ արդեն տարիներ ամբիոնի վարիչի պաշտոնում աշխատող Ս. Գրիգորյանը իրեն դրսևորել է որպես գիտական գործի լավագույն կազմակերպիչ՝ ծավալելով նաև բեղուն գիտական գործունեություն:

Բ. գ. դ., պրոֆեսոր Ժ. Քալանթարյանն էլ նշեց, որ բացի լավ գիտնական ու ղեկավար լինելուց, Գրիգորյանը նաև հանրապետությունում ընդունված և հայտնի գրականագետ է:

Բ. գ. դ., պրոֆեսոր Յու. Ավետիսյանը, դոց. Ա. Գալստյանը ևս իրենց խոսքում բարձր գնահատեցին Ս. Գրիգորյանի գիտական, կազմակերպչական և մանկավարժական հատկանիշները՝ կոչ անելով քվեարկել թեկնածուի օգտին:

Ելույթներից հետո, համաձայն ընթացակարգի, փակ-գաղտնի քվեարկություն անցկացնելու համար ընտրվեց ձայներ հաշվող հանձնաժողով՝ հետևյալ կազմով՝

1. Նարինե Դիլբարյան – նախագահ
2. Արամ Խաչատրյան
3. Գոհար Օհանջանյան

Փակ-գաղտնի քվեարկությունից հետո նախագահ, դոց. Նարինե Դիլբարյանը հրապարակեց արդյունքները.

Խորհրդի 32 անդամներից նիստին ներկա են եղել և քվեարկությանը մասնակցել են 26-ը:

Բաժանվել է 26 քվեաթերթիկ:

Քվեատուփում եղել է 26 քվեաթերթիկ:

Քվեարկությանն արդյունքներն են՝

Հ/Հ	Թեկնածուի ազգանուն, անուն, հայրանուն	ԿՈՂՄ	ԴԵՄ	ԱՆՎԱՎԵՐ
1.	Գրիգորյան Սեյրան Զավենի	23	2	1

Անվավեր քվեաթերթիկների քանակը՝ 1:

Ո Ր Ո Շ Ե Ց Ի Ն - 1. Հաշվի առնելով փակ-գաղտնի քվեարկության արդյունքները՝ Բ. Գ. Թ., դոցենտ Սեյրան Զավենի Գրիգորյանին ընտրված համարել հայ նորագույն գրականության պատմության և գրաքննադատության ամբիոնի վարիչի պաշտոնում:

2. Միջնորդել համալսարանի գիտական խորհրդին՝ հաստատելու ֆակուլտետի գիտխորհրդի քվեարկության արդյունքները և խնդրել ռեկտորին, գործող կարգի համաձայն, ընտրված թեկնածուի հետ կնքել աշխատանքային պայմանագիր:

Օրակարգի 2-րդ հարցի առթիվ հայ բանասիրության ֆակուլտետի ղեկան, դոց. Ա. Գալստյանը տեղեկացրեց, որ հայ բանասիրության ֆակուլտետի բակալավրիատի առկա ուսուցման ամփոփիչ ատեստավորման հանձնաժողովի նախագահներ Բ. Գ. Դ. Թերեզա Շահվերդյանը և Հ. Որսկանյանը հարգելի պատճառով ներկա չեն նիստին, սակայն հաշվետվությունը ուղարկել են, և հայ բանասիրության ֆակուլտետի գրասենյակի ղեկավար Ա. Սարգսյանը ընթերցեց հաշվետվությունը, որում մասնավորապես նշված էր.

2024-25 ուստարում «Հայ գրականություն» առարկայից ավարտական աշխատանք է պաշտպանել 27 ուսանող: Ութ ուսանող ստացել է 20 միավոր, մեկ ուսանող ստացել է 19 միավոր, հինգ ուսանող՝ 18 միավոր, հինգ ուսանող՝ 17 միավոր, մեկ ուսանող՝ 16 միավոր, մեկ ուսանող՝ 15 միավոր, երկու ուսանող՝ 14 միավոր, մեկ ուսանող՝ տասներեք միավոր, երկու ուսանող՝ 12 միավոր և մեկ ուսանող՝ 10 միավոր:

«Հայոց լեզու» առարկայից ավարտական աշխատանք է պաշտպանել 30 ուսանող: Տասը ուսանող ստացել է 20 միավոր, ութ ուսանող՝ 19 միավոր, հինգ ուսանող՝ 18 միավոր, երեք ուսանող՝ 17 միավոր, երեք ուսանող՝ 16 միավոր, մեկ ուսանող՝ 15 միավոր:

Ավարտական աշխատանքների պաշտպանությունն անցել է գործող ընթացակարգին համապատասխան, բողոքարկումներ չեն եղել: Պաշտպանության ներկայացված

ավարտական աշխատանքներն ընդհանուր առմամբ համապատասխանում էին ներկայացվող պահանջներին և գիտական չափանիշներին:

Աշխատանքներում, ըստ կանոնակարգային պահանջի, ներկայացված էին ուսումնասիրության նպատակը, խնդիրները, ակնկալվող արդյունքները, հիմնավորված էր արդիականությունը, ներկայացված էր համապատասխան գրականությունը, պահպանված էին նաև կառուցվածքային, տեխնիկական պահանջները:

Պաշտպանության ընթացքում ուսանողները ցուցադրում էին նաև աշխատանքի լուսապատկերային տարբերակը:

Պաշտպանությանը մասնակցած ուսանողները հիմնականում կարողանում էին ներկայացնել իրենց կատարած աշխատանքը, պատասխանել հանձնաժողովի հարցերին:

Ընդհանուր առմամբ ուսանողների մասնագիտական գիտելիքները համապատասխանում էին պահանջվող մակարդակին, և թերի պատասխանները փոքրաթիվ էին: Ավարտական աշխատանքների թեմաները հիմնականում հաջող էին ընտրված: Դրանք մեծ մասամբ արդիական էին, կային արդեն հայտնի թեմաների նորովի մեկնաբանություններ: Նշենք, որ որոշ թեմաներ կարելի էր քննել նյութին առնչվող առավել ընդգրկուն համատեքստում: Ցանկալի է, որ ուսանողները ցուցաբերեին ավելի շատ վերլուծական մոտեցում:

Ներկայացված աշխատանքների ընդհանուր որակը, ուսանողների պատրաստվածությունը վկայում էին, որ ավարտական աշխատանքների ղեկավարները և համապատասխան ամբիոնները իրենց աշխատանքը կատարել են անհրաժեշտ մակարդակով: Աշխատանքներում հիմնականում պահպանված էին նաև տեխնիկական պահանջները:

Գրախոսները ևս իրենց կարծիքները ներկայացրին պահանջված չափանիշներին համապատասխան: Գրախոսություններում հստակ նշված էին ավարտական աշխատանքներում առկա վրիպակներն ու թերությունները, արվեցին տեղին դիտարկումներ, որոնք, կարծում ենք, օգտակար կլինեն հետագայում գիտական այլ աշխատանքներ կատարելիս:

Պաշտպանության ընթացքում պահպանված էին ընթացակարգային պահանջները, որոնք վկայում են ֆակուլտետի ղեկանի և ղեկանատի աշխատակիցների բարեխիղճ աշխատանքի մասին:

Օրակարգի 3-րդ հարցի վերաբերյալ.

Ա) ԼՍԵՑԻՆ – Հայոց լեզվի պատմության և ընդհանուր լեզվաբանության ամբիոնի առկա ասպիրանտ **Վարդուհի Արտաշեսի Բարսեղյանի** տարեկան ատեստավորման հարցը:

ԱՐՏԱՀԱՅՏՎԵՑԻՆ. - Պրոֆ. Ա. Աբաջյանը, դոց., դոց. Ա. Գալստյանը, Ն. Դիլբարյանը, Վ. Պետրոսյանը և այլք:

Նշվեց, որ Վարդուհի Բարսեղյանը ուսումնական տարվա սեպտեմբերի 2-ից մինչև

փետրվարի 3-ը «Էրազմուս+» միջազգային կրեդիտային շարժունության գործողության շրջանակում ուսանել է Վենետիկի Կա Ֆոսկարիի համալսարանի Ասիայի և Հյուսիսային Աֆրիկայի ուսումնասիրությունների ֆակուլտետում: Ուսումնառության ընթացքում այցելել է Վենետիկի Սուրբ Ղազար կղզի, ծանոթացել կղզու պատմությանը, միաբանության գիտական, գրական, մշակութային գործունեությանը: 2024 թվականի հոկտեմբերի 31-ից մինչև նոյեմբերի 3-ը մասնակցել է Միսիթարյան Միաբանության մայրավանքում անցկացված միջազգային գիտաժողովին՝ նվիրված Միսիթար աբբահոր մահվան 275 ամյակին:

Նշյալ ուսումնական տարվա ընթացքում թեկնածուական ատենախոսության թեման մասնակիորեն փոփոխվել է: Դրանով պայմանավորված՝ կատարել է ատենախոսության կառուցվածքի փոփոխություն, ուսումնասիրել գրականության ցանկը, սկսել աշխատանքի հիմք հանդիսացող իմաստային դաշտերի քարտագրումը, ինչպես նաև կատարել որոշ եզրահանգումներ: Տպագրել է մեկ հոդված, տպագրության է պատրաստում երկու նոր հոդված:

ՈՐՈՇԵՑԻՆ – Հայոց լեզվի պատմության և ընդհանուր լեզվաբանության ամբիոնի առկա ասպիրանտ Վարդուհի Արտաշեսի Բարսեղյանին ատեստավորել:

Բ) ԼՍԵՑԻՆ – Հայոց լեզվի ամբիոնի առկա ասպիրանտ **Գայանե Դալլաքյանի** տարեկան ատեստավորման հարցը:

ԱՐՏԱՀԱՅՏՎԵՑԻՆ. - Պրոֆ. Յու. Ավետիսյանը, դոց., դոց. Ա. Գալստյանը, Ա. Տեր-Մինասյանը, Թ. Տոնոյանը, Մ. Ֆալաքյանը և այլք:

Նշվեց, որ Գայանե Դալլաքյանը ասպիրանտական 3 տարիների ընթացքում չի դրսևորել գիտական անհրաժեշտ պատրաստականություն և պարտաճանաչություն և չնայած ամբիոնի մշտական հորդորներին և ներողամիտ վերաբերմունքին՝ ատենախոսության թեմայի վերաբերյալ որևէ աշխատանք և ուսումնասիրություն չի ներկայացրել գիտական ղեկավարին: Ուսումնառության տարիների ընթացքում որևէ գիտական հոդված չի պատրաստել, որևէ շարադրանք չունի: Ընթացիկ ուսումնական տարվա ընթացքում դարձյալ որևէ նոր բան չի արել, ղեկավարի հետ չի հանդիպել: Ասպիրանտական ժամկետի ավարտին մնացել է 6 ամիս, իսկ Գ. Դալլաքյանը աշխատանքի վերաբերյալ գիտական հրապարակում կամ գոնե որևէ նյութ չունի:

ՈՐՈՇԵՑԻՆ – Հայոց լեզվի ամբիոնի առկա ասպիրանտ Գայանե Դալլաքյանին չատեստավորել:

Գ) ԼՍԵՑԻՆ Հայոց լեզվի պատմության և ընդհանուր լեզվաբանության ամբիոնի առկա ասպիրանտ **Զանկե Լոնի** տարեկան ատեստավորման հարցը:

ԱՐՏԱՀԱՅՏՎԵՑԻՆ. - Պրոֆ. Ա. Աբաջյանը, դոց., դոց. Ա. Գալստյանը, Ն. Դիլբարյանը, Վ. Պետրոսյանը և այլք:

Նշվեց, որ **Զանկե Լոնը** սկսել է թեզի սկզբնաղբյուրների հավաքման և հանգամանալի մշակման աշխատանքները: Հավաքել է հայերեն, չինարեն և անգլերեն տեսական

գրականության ցանկը անհրաժեշտ մենագրություններով, հոդվածներով և բառարաններով: Սկսել է դրանք ուսումնասիրել: Այժմ աշխատում է համապատասխան լեզվամշակութային շտեմարան կազմելու ուղղությամբ՝ հայոց և չինական:

Տպագրության է պատրաստում 2 հոդված:

ՈՐՈՇԵՑԻՆ – Հայոց լեզվի պատմության և ընդհանուր լեզվաբանության ամբիոնի առկա ասպիրանտ **Զանկե Լոնին** ատեստավորել:

Դ) ԼՍԵՑԻՆ – Հայոց լեզվի ամբիոնի առկա ասպիրանտ **Արևիկ Գառնիկի Խամոյանի** տարեկան ատեստավորման հարցը:

ԱՐՏԱՀԱՅՏՎԵՑԻՆ. - Պրոֆ. Յու. Ավետիսյանը, դոց., դոց. Ա. Գալստյանը, Ա. Տեր-Մինասյանը, Թ. Տոնոյանը, Մ. Ֆալաքյանը և այլք:

Նշվեց, որ աշնանային և գարնանային կիսամյակներում Արևիկ Խամոյանը մասնակցել է ասպիրանտների համար նախատեսված պարտադիր և կամընտրական դասընթացներին՝ հավաքելով 21 կրեդիտ:

Արևիկ Խամոյանի ատենախոսության թեման է «Թվային գովազդի լեզուն»: Ուսումնասիրում է ատենախոսության թեմայի հետ կապված նյութեր. մշակվել է աշխատանքի կառուցվածքը, կատարվել է քարտազրույց: Տպագրության է պատրաստում առաջին հոդվածը:

ՈՐՈՇԵՑԻՆ – Հայոց լեզվի ամբիոնի առկա ասպիրանտ **Արևիկ Խամոյանին** ատեստավորել:

Ե) ԼՍԵՑԻՆ – Հայոց լեզվի պատմության և ընդհանուր լեզվաբանության ամբիոնի առկա ասպիրանտ **Կամո Անթերանիկի Էֆրահիմի** տարեկան ատեստավորման հարցը:

ԱՐՏԱՀԱՅՏՎԵՑԻՆ. - Պրոֆ. Ա. Աբաջյանը, դոց., դոց. Ա. Գալստյանը, Ն. Դիլբարյանը, Ս. Ավետյանը և այլք:

Նշվեց, որ **Կամո Անթերանիկի Էֆրահիմը** ուսումնասիրել է ատենախոսության վերաբերյալ գրականությունը, ամբողջությամբ քարտազրել է անհրաժեշտ նյութը, կատարել դասակարգումներ, համեմատել հայերեն և պարսկերեն փոխառյալ կենդանանունները:

Շարադրել է ատենախոսության առաջին երկրորդ գլուխները:

ՈՐՈՇԵՑԻՆ – Հայոց լեզվի պատմության և ընդհանուր լեզվաբանության ամբիոնի առկա ասպիրանտ **Կամո Անթերանիկի Էֆրահիմին** ատեստավորել:

Զ) ԼՍԵՑԻՆ – Հայոց լեզվի ամբիոնի առկա ասպիրանտ **Ամայա Հունանի Հարությունյանի** տարեկան ատեստավորման հարցը:

ԱՐՏԱՀԱՅՏՎԵՑԻՆ. - Պրոֆ. Յու. Ավետիսյանը, դոց., դոց. Ա. Գալստյանը, Ա. Տեր-Մինասյանը, Թ. Տոնոյանը, Մ. Ֆալաքյանը և այլք:

Նշվեց, որ աշնանային և գարնանային կիսամյակներում **Ամայա Հարությունյանը** մասնակցել է ասպիրանտների համար նախատեսված պարտադիր և կամընտրական դասընթացներին՝ հավաքելով 21 կրեդիտ:

Ամալյա Հարությունյանի ատենախոսության թեման է «Գրաբար-միջին հայերեն-արևմտահայերեն փոխանցումները հայերենի անվաական համակարգում»: Ուսումնասիրում է ատենախոսության թեմայի հետ կապված նյութեր. մշակվել է աշխատանքի կառուցվածքը, կատարվել է քարտագրում: Տպագրության է պատրաստում առաջին հոդվածը:

ՈՐՈՇԵՑԻՆ – Հայոց լեզվի ամբիոնի առկա ասպիրանտ Ամալյա Հարությունյանին ատեստավորել:

Է) **ԼՍԵՑԻՆ** – ԵՊՀ հայ նորագույն գրականության պատմության և գրաքննադատության ամբիոնի առկա ասպիրանտ Հովհաննես Հովակիմի Հովակիմյանի տարեկան ատեստավորման հարցը:

ԱՐՏԱՀԱՅՏՎԵՑԻՆ. - Պրոֆ. պրոֆ. Ալ. Մակարյանը, Ժ. Քալանթարյանը, դոց. դոց. Ա. Գալստյանը, Ս. Գրիգորյանը, Ա. Ջրբաշյանը և այլք:

Նշվեց, որ Հովհաննես Հովակիմյանը մասնակցել է պարտադիր և կամընտրական դասընթացներին, հանձնել է ստուգաթղթեր: Ատենախոսության թեմայի վերաբերյալ կատարել է հետազոտական աշխատանքներ: Հրատարակել է երեք հոդված, որից մեկը՝ միջազգային գիտական ամսագրում: Ատենախոսությունը շուտով ամբողջությամբ շարադրված կլինի և կներկայացվի պաշտպանության:

ՈՐՈՇԵՑԻՆ – ԵՊՀ հայ նորագույն գրականության պատմության և գրաքննադատության ամբիոնի առկա ասպիրանտ Հովհաննես Հովակիմի Հովակիմյանին ատեստավորել:

Ը) **ԼՍԵՑԻՆ** – Ակադ. Հր. Թամրազյանի անվան հայ գրականության պատմության և գրականության տեսության ամբիոնի առկա ասպիրանտ **Աշոտ Մկրտչի Մկրյանի** տարեկան ատեստավորման հարցը:

ԱՐՏԱՀԱՅՏՎԵՑԻՆ. - Պրոֆ. պրոֆ. Ալ. Մակարյանը, Ժ. Քալանթարյանը, դոց. դոց. Ա. Գալստյանը, Վ. Եղիազարյանը, Ա. Ջրբաշյանը և այլք:

Նշվեց, որ Աշոտ Մկրյանը ընթացիկ ուսումնական տարվա ընթացքում մասնակցել է ասպիրանտուրական դասընթացների՝ հավաքելով անհրաժեշտ կրեդիտները, Ասպիրանտը ուսումնական տարվա ընթացքում կազմել է թեկնածուական ատենախոսության հետազոտական ծրագիրը, կառուցվածքը, ուսումնասիրել գրականության ցանկը և անհրաժեշտ նյութերը: Տպագրության է ներկայացրել մեկ հոդված, պատրաստում է երկրորդը:

ՈՐՈՇԵՑԻՆ – Ակադ. Հր. Թամրազյանի անվան հայ գրականության պատմության և գրականության տեսության ամբիոնի առկա ասպիրանտ **Աշոտ Մկրյանին** ատեստավորել:

Օրակարգի 4-րդ հարցի առթիվ.

ԼՍԵՑԻՆ– Հայ բանասիրության ֆակուլտետի բակալավրիատի և մագիստրատուրայի 2024-25 ուստարվա կրթական ծրագրերի ղեկավարներ պրոֆ., պրոֆ. Յու. Ավետիսյանի, Ա. Աբաջյանի, Ս. Գրիգորյանի, դոց. Ա. Սարգսյանի հաշվետվությունները կատարած աշխատանքների վերաբերյալ:

ԱՐՏԱՀԱՅՏՎԵՑԻՆ - Պրոֆ. պրոֆ. Ա. Աբաջյանը, Յու. Ավետիսյանը, Ս. Գրիգորյանը, դոց. դոց. Ա. Գալստյանը, Ա. Սարգսյանը, Ա. Ջրբաշյանը:

Նշվեց, որ «Հայոց լեզու և գրականություն» բակալավրի կրթական ծրագրում իրականացվել են ԵՊՀ ուսումնական գործընթացի կազմակերպման նոր կարգով հաստատված փոփոխություններին վերաբերող աշխատանքները, ծրագրի կազմակերպումն ու իրականացումը պատշաճ մակարդակի վրա են: Ֆակուլտետում գործող մագիստրոսական ծրագրերը՝ **«Ժամանակակից հայոց լեզու և թարգմանչական գործ»**, **«Հայոց լեզվի պատմություն և լեզվաբանություն»**, **«Հայ գրականություն»**, իրականացվում են 1,5 տարում, ծրագրերում ներառված դասընթացները դասավանդվում են պատշաճ մակարդակով՝ ապահովելով անհրաժեշտ վերջնարդյունքները: Մշտադիտարկման արդյունքներով ճշգրտվում են ծրագրերում ներառված դասընթացների դասավանդման որակը, դրանց տեսագործական արդյունավետությունը:

Աշխատաշուկայի հետ կապը զարգացնելու նպատակով մագիստրոսական ծրագրերի՝ 2024-2025 ուստարվա ուսումնական պլանում մշակվել և ներդրվել են նոր դասընթացներ:

ՈՐՈՇԵՑԻՆ – Արձանագրել, որ հայ բանասիրության ֆակուլտետի բակալավրի և մագիստրոսական կրթական ծրագրերի ղեկավարները բավարար կերպով կատարել են ուսումնական գործընթացի կազմակերպման կարգով նախատեսված աշխատանքները:

Ընթացիկ հարցերում քննարկվեցին.

ա/ ԼՍԵՑԻՆ – Բ. գ. թ. Արա Սմբատի Զարգարյանի՝ «Եղիշե Չարենց. կերպար և նախակերպար» գիրքը տպագրության երաշխավորելու հարցը:

ԱՐՏԱՀԱՅՏՎԵՑԻՆ - Պրոֆ. պրոֆ. Ա. Մակարյանը, Ս. Մուրադյանը, Վ. Սաֆարյանը, դոց., դոց., Ա. Գալստյանը, Ս. Գրիգորյանը, Ա. Ջրբաշյանը և ուրիշներ:

Նշվեց, որ Ա. Զարգարյանի՝ «Եղիշե Չարենց. կերպար և նախակերպար» աշխատանքը նոր դիտանկյունից է բացահայտում Եղիշե Չարենցի ստեղծագործության վերջին շրջանը՝ ընդգծելով կերպարի և նախակերպարի փոխհարաբերության խորության և բազմաշերտության կարևորությունը: Ուսումնասիրության առանցքում Չարենցի չափածո գործերն են՝ գրված 1930-ականների կեսերին, երբ գրողի գրական մտածողությունը հասել էր իր փիլիսոփայական ու գեղարվեստական հասունության գագաթնակետին: Ներկայացվող նյութում կերպարի և նախակերպարի մեկնաբանությունը բացահայտվում է որպես ստեղծագործական ինքնատիպ մեխանիզմ. կերպարը երբեք ուղղակի արտացոլանք չէ իրական նախատիպի, այլ հեղինակային վերափոխման ենթարկված խորհրդանշային ամբողջություն է: Դրանք կարող են ունենալ կենսագրական, պատմամշակութային և ներանձնական հիմքեր՝ միաձուլվելով ու վերաճելով համամարդկային ու համազգային խորհրդանիշների: Ուսումնասիրության մեջ առանձնահատուկ շեշտադրվում է Չարենցի ինքնապատկերման երևույթը՝ որպես գեղարվեստական գործընթաց: Դիտարկվում է, թե ինչպես է գրողը կերպարի մեջ ներառել սեփական «ես»-ը՝ վերապրումներն ու

փիլիսոփայական որոնումները վերածելով համընդհանուր տազնապի և հոգևոր դիմադրության արտահայտման: Այդ կերպարները հանդես են գալիս նաև որպես ժամանակի խորհրդանշական արտացոլումներ՝ լեցուն ներքին դրամատիզմով, գոյաբանական հարցադրումներով, ազգային հիշողության տարրերով:

Ուսումնասիրության մեջ Չարենցի վերջին շրջանի գրականությունը դիտարկվում է ոչ միայն գեղարվեստական ժառանգության, այլև ժամանակի ու մշակույթի հետ մշտական երկխոսության համատեքստում:

Սույն ուսումնասիրությունը մի կողմից բացահայտում է Չարենցի ստեղծագործական խորաթափանց մտածողությունը, իսկ մյուս կողմից հղում է դառնում մեր ժամանակի գեղարվեստական ու հոգևոր հարցադրումների պատասխանների որոնման գործում: Չարենցի պոեզիան, ըստ ուսումնասիրության հեղինակի, վեր է հառնում որպես ազգային փորձառության և մշակութային դիմադրության խորհրդանիշ՝ ներկայանալով որպես ժամանակից դուրս ձայն, որը, սակայն, շարունակում է մնալ ժամանակի սրտում:

ՈՐՈՇԵՑԻՆ – Բ. գ. թ. Արա Սմբատի Զարգարյանի՝ «Եղիշե Չարենց. կերպար և նախա-կերպար» գիրքը երաշխավորել տպագրության:

բ/ ԼՍԵՑԻՆ – Հայոց լեզվի ամբիոնի ասիստենտ Լիլիթ Պապիկյանի «Գեղամ Սարյանի չափածոյի խոսքարվեստը» գիրքը տպագրության երաշխավորելու հարցը:

ԱՐՏԱՀԱՅՏՎԵՑԻՆ - Պրոֆ. պրոֆ. Յու. Ավետիսյանը, Ս. Մուրադյանը, դոց. դոց. Ա. Գալստյանը, Ա. Տեր-Մինասյանը, ասիստ. Լ. Մելքոնյանը և ուրիշներ:

Նշվեց, որ գիրքը արդիական է և արժեքավոր քննվող հարցերի շրջանակով ու վերլուծություններով, կարևոր նշանակություն ունի ոճագիտության, մասնավորապես հեղինակային մշակումների լեզվաոճական քննության առումով, քանի որ ստեղծագործական աշխատանոցին վերաբերող լեզվական ուսումնասիրություններ մեզանում գրեթե չկան: Քննության առումով Գ.Սարյանի չափածոյի խոսքարվեստը հեղինակին տվել է հնարավորություններ ստեղծագործությունների լեզվական, ոճական միջոցները վերհանելու, և գրքի հստակ կառուցվածքը դրա վկայությունն է: Գիրքը օգտակար կարող է լինել ոճագիտության հարցերով զբաղվող մասնագետների և ընթերցող լայն շրջանակների համար: Գրքի խմբագիրն է Բ. գ. թ., դոց. Անահիտ Ադիլսանյանը:

ՈՐՈՇԵՑԻՆ – Հայոց լեզվի ամբիոնի ասիստենտ Լիլիթ Պապիկյանի «Գեղամ Սարյանի չափածոյի խոսքարվեստը» գիրքը երաշխավորել տպագրության:

ՀԱՅ ԲԱՆԱՍԻՐՈՒԹՅԱՆ ՖԱԿՈՒԼՏԵՏԻ

ԳԻՏԱԿԱՆ ԽՈՐՀՐԴԻ ՆԱԽԱԳԱՀ՝

ԳԻՏՔԱՐՏՈՒՂԱՐ՝

Ա. ԳԱԼՍՏՅԱՆ

Լ. ՄԵԼՔՈՆՅԱՆ

